



本著作以創用CC「姓名標示-非商業性-禁止改作」4.0國際授權條款釋出。  
詳細授權條款，請至 <http://creativecommons.org/licenses/by-nc-nd/4.0/>。  
資料來源：教育部電子報「閱讀趣懂閩客語」專欄 <http://epaper.edu.tw>。

閩／人物／☆☆★★

## 跔大雪山頂種樹仔

臺灣有一个種樹仔大王，叫做賴倍元。1986年，賴桑若像青盲的毋驚銃，開三千萬買五甲的山坡地，煞去買著一粒糞埕山，車兩千車的糞埕才清出一塊空地仔。就按呢，開始伊種樹仔的人生。這馬伊已經植甲十粒山相連，山頂攏是懸拄天，國寶級的樹仔。這片山林伊無欲賣、無欲剉，嘛無欲留予罔孫，拍算全部攏欲獻予臺灣。

若是你有上億的財產，你會按怎開？大部份的人攏會選擇去投資，錢絞錢想欲趁閣較濟錢，抑是開免驚的盡量去享受。毋過這個有數十億家產的賴桑，伊的想法是：「干焦種樹仔投資未來，才會當補償過去咱人對環境的損害。」賴桑用掉所有的家伙去種樹仔，開創一大片曠闊的山林。伊認為共過去人類損蕩的資源，用種樹仔的方式共還轉去予大自然，才是上有意義的投資。伊這種對大自然的熱情恰阿戇仔的做法，予人共譬相做「天下第一戇人」。

賴桑國中出業了後，就開始扞厝裡的運送店。彼當陣，拄好是臺灣農業轉對工業的年代，貨運產業當興，猶未廿五歲的賴桑就已經是家產數十億的大頭家矣。花無百日紅，時間經過，伊看著捌服務過的大公司，十間有九間倒。伊認為文明科技的進步比袂過精神的境界，人生是愛追求做大代誌，毋是做大企業嘛毋是趁大錢，青翠閣萬年久遠的山林才真正是永遠的財富。

就因為看著山坡地予人翹甲烏魯木齊，定定有塗石流的意外咧發生，伊智覺著臺灣的土地已經袂當閣繼續破壞落去，愛趕緊共樹仔種倒轉去。伊去請教足濟木材行的頭家，共個問講：大雪山頂種啥物樹仔較好咧？得著的答案是：種咱臺灣千年的國寶樹，親像松梧、紅豆杉上好。自按呢，這個少年的賴桑就開始伊種樹仔的人生。

賴桑用伊的手替未來種落希望的種子，現此時，這片山林有濟濟的性命咧生炭。賴桑用家己的雙手創造千變萬化豐富的生態，伊共天公伯仔予伊的福報，轉變做對臺灣這塊土地的大愛！

作者：曾裕樞

### ☆詞彙學習☆

【青盲毋驚銃】Tshenn-mê /Tshinn-mî  
m̄-kiann tshing：形容人不知道害怕、勇往直前；也有有勇無謀之意。

【植】hùn：向外擴張，例如邊界。

【剉】tshò：砍。用刀斧劈。

【家伙】ke-hué/ke-hé：財產。

【損蕩】sng-tng：破壞、糟蹋。

【譬相】phì-siunn：尖酸的諷刺、奚落。

【扞】huānn：主持、掌管。

【翹】phún：踐踏。

【烏魯木齊】oo-lóo-bók-tsè：指人不精細分明、過於草率，喜歡胡說八道。

【智覺】tì-kak：察覺、發覺、意識到。

【松梧】siōng-ngôo：檜木。

【生炭】senn-thuānn/sinn-thuānn：生育繁殖。